

TORITENY - ALAHADY faha-23 TSOTRA - TAONA D



*Na iza na iza tsy mahafofy izay rehetra ananany
dia tsy mendrika ho mpianatro.*

Ry kristianina havana, raha tamin'ny Alahady lasa teo nampisongadina fa raha te-hiditra ho anisan'ny fianakaviamben'Andriamanitra isika, ho olo araiky ao aminy ho Fratelli Tutti ka Mpiray Tampo ao Aminy dia tsy maintsy manahaka an'i Jesoa, Izy izay Andriamanitra dia nanaiky nanetry tena nidina farany ambany hoy Md Paoly ao amin'ny taratasy ho an'ny Filipiana. Natitranterintsika fa tsy maintsy manana fanetren-tena sy halemem-panahy ary fahatsorana isika ary izay ny fanahafana an'i Kristy.

Amin'izao Alahady faha-23 mandavantaona izao dia miombona amin'ireo hohamasinana pretra any Andapa amin'ny herin'ny niany. Enga anie hanahaka an'i Kristy izy ireo ka ho tanteraka amin'izy ireo tokoa ny foto-kevitra amin'izao alahady izao : “Izay tia mahafofy”. Mitaky fanetren-tena sy halemem-panahy ny fanarahan-dia an'i Jesoa. Izy I Jesoa rahateo

Vakiteny I : Fah. 9, 13-18

Salamo : Sal. 89

Vakiteny II : Filem. 9b-10. 12-17

Evanjely : Lk. 14, 25-33

nampianatra antsika fa raha te-hiditra amin'ny fanjakan'Andriamanitra dia tsy maintsy manana ny toetran'ny tsaiky madinika isika dia tsy inona fa ny fanetren-tena sy fahalemem-panahy.

Toetra anankiray ambaran'i Jesoa koa amin'izao Alahady izao dia ny fahafoizana, tsy hanana an'izay toetra izay isika raha tsy manetry tena sy malemy fanahy ary feno fahatsorana. Izay tia dia mahafofy hoy i Jesoa. Toetra lehibe tsy maintsy hananantsika izany raha tiantsika ny hifanasoa, hikatsaka ny soa iombonana, io no mitondra antsika amin'ny fiombonana tanteraka ao amin'i Jesoa. Izay no mahatonga antsika hanana ny fivoarana marina tokoa. Amin'ny alalan'ny fikatsahana ny soa iombonana izay no hahazoantsika tokoa ny tena fiadanana, ny tena fahasambarana ary ny tena fivoarana maharitra izay tiantsika satria tsapa fa lavitra an'izany tokoa isika.

Efa manakaiky ny famaranana ny dingana voalohany amin'ny Sinaody faha-7 ataontsika. Raha tiantsika hamokatra ny Sinaody dia tsy maintsy mahafofy isika. Anisan'ny toe-panahy

amin'ny ezaka mameno siny rahateo io fahafoizana. Ny fahafoizana no ahafahantsika mifampitroatra ary mifampihaino.

Tsy ho tanteraka izany vina sy ezaka ataontsika izany, fandraisana an-tanana no hamintinana azy, raha tsy misy ny fahafoizana. Naverimberintsika matetika izany fa amin'izao Alahady faha-23 izao dia hamafisana eto fa tsy ho tanteraka tokoa ny Eglizy Olo velomin'ny Batemy miombona miara-dia mandray an-tanana raha tsy misy fanetren-tena, raha tsy misy fahafoizana. Io no tian'ny Mpanoratra ny Bokin'ny Fahendrena ambara ao amin'ny vakiteny voalohany (*Fah. 9,1318*).

Ny tena fahendrena dia ny mahatakatra ny sitrapon'Andriamanitra izany hoe mahafofy : miala amin'ny sitrapon'ny tena, amin'ny fitiavan-tena, amin'ny avonavona sy ny fialonana, ireo no mahatonga ny herisetra sy ny korontana isan-karazany. Raha mahafofy isika araka ny fampianaran'ny bokin'ny fahendrena dia izay fahendren'Andriamanitra ary ambaran'i Jesoa satria tsy nanao kobaka am- bava izy raha nampianatra an'izany fa ny fiainany manontolo no manambara fahafoizana.

Izany koa no maha Kristianina antsika ka aoka ary ry Kristianina havana, hiombona bebe kokoa amin'i Kristy isika ka hiala amin'ireny fitiavan-tena ireny, hahafofy isika izany hoe hahafofy ireo harena tsy mifanaraka amin'ny fahendren'Andriamanitra. I Md Paoly ao amin'ny vakiteny faharoa (*Filem. 9b-10. 12-17*) dia mampianatra an'i Filemona. Tena tiany tokoa i Onezimo, nanasoa azy izy tamin'ny fikarakarana rehetra kanefa noho izany fahafoizana izany no lalam-pianan'ny mpianatr'i Kristy dia nahafofy an'i Onezimo izy ary nasainy niverina any amin'ny Filemona i Onezimo satria araka ny fantantsika dia andevon'i Filemona taloha i Onezimo, ka hoy i Md Paoly nananatra an'i Filemona mba ho toy ny rahalahy fa tsy andevo intsony.

Izay tokoa no vokatry ny fahafoizana ry Kristianina havana, mpirahalaha isika, mpianakavy ao amin'i Kristy araka ny hira ataontsika. Zary Fratelli Tutti, Mpiray Tampo tokoa isika ka manorina Fianakaviamben'Andriamanitra zary Olo Araiky isika Jiaby raha mivelona ny fahafoizana. Tsy ho tanteraka anefa io fahafoizana raha tsy miala amin'ny fitiavan-tena. Mitaky fanetren-tena sy halemem-panahy ary fahamarinana ny fahafoizana. Izany no antitranterin'i Jesoa amintsika ao amin'ny Evanjely (*Lk. 14, 25-33*) izay dinihintsika izao : Raha te-hanaradia azy sy te-hanatona azy dia tsy maintsy hametraka azy ambonin'ny zavatra rehetra. Ny fametrahana azy amin'ny voalohan-toerana no fahafoizana tadiavin'i Jeso izy no harena voalohany ka amin'ny alalany sy miaraka aminy no hitiavana ny zavatra rehetra sy izay manodidina antsika. Izay ny dikan'ny hoe "mankahalà ny ray aman-dreninao, ny rahalahy sy anabavinao". Tsy hoe hanapotika, hamono an'izy ireo isika sanatria fa ny tadiavin'i Jesoa dia mba ho izy no voalohan-toerana ka amin'ny alalany sy miaraka aminy no hitiavana an'ireo havantsika rehetra ireo.

Izany tokoa no ho tanteraka amintsika raha izy no ivom-piainantsika ka amin'izay dia hiadam- pinaritry isika, izy no atao safidy voalohany. Ilaina àry izany ny handiniansika alohan'ny hiroso amin'ny zavatra atao ary ampianariny antsika izany, mba ho afaka hahafofy tanteraka mba hahay handinika ny fiainantsika. Izany hoe mba hahomby amin'ny ataontsika isika dia aoka handinika tsara tahaka an'ireo handeha hiady atao izay hifanarahana, tahaka an'ireo hanorina trano avo, manontany tena ho vitako ve sa tsy ho vitako?

Ny tian'i Jesoa ambara dia ilay fitenintsika matetika hoe "Ady sady dia ny fiainana".

Ady amin'ny fakam-panahy fa indrindra amin'ny fitiavan-tena izay fantantsika fa fanilikilihana no vokany ary raha manilikilika dia ao anatin'ny herisetra sy fanapotehana. Rehefa izany no manjaka dia korontana lalandava ny fiainana ka aleo mandinika tsara alohan'ny hanatanteraka an'izao sy izao. Ary ny tena loza raha mikasika ny maha izy ny tena izany "identité" no voakasika dia miteraka korontana anaty satria ny kôsiansy no voadona. Izany no mahatonga ny sasany mamono eritreritra amin'ny zavatra ety ivelany toa ny toaka na ny zava-mahadomelina sns...

Ny fahafoizana dia tsy maintsy misy zavatra miala eo amin'ny fiainana ka izay zavatra afovy izay no marary indraindray ary izay no atao hoe sedra, fijaliana hoy i Jesoa ka na manao akory na manao akory tsy maintsy marary ny fahafoizana ka mila ho dinihana tsara. Izany no mahatonga an'i Jesoa milaza amintsika hoe na iza na iza aminareo tsy hahafoy izay rehetra ananany dia tsy mety ho mpianatro. Izay no tsy maintsy ho tanterahintsika amin'ny fiainantsika, ny fahafoizana sy halemem-panahy no varavarana ety izay nantitraterintsika nandritra ireo Alahady telo lasa izay, tsy maintsy miditra amin'ny varavarana ety izay te-ho anisan'ny fianakaviamben'Andriamanitra.

Afaka hiditra amin'izany isika raha manana fahalemem-panahy sy fanetren-tena izay manambara fahafoizana, izany hoe tsy mifikitra amin'ny tenantsika fa mahafovy ho an'ny namana izay no lalana nofidin'i Kristy ary dia izay koa ny lalantsika mianakavy.

Raha te ho mpianatr'i Kristy isika aoka ho vonona handao ny zavatra tsy fovy ary dia ho vonona hitondra ny hazo fijaliana miaraka amin'i Kristy izay manambara an'izany fahafoizana izany. Tsy vitantsika samirery tokoa izany ka mila ny herin'Andriamanitra isika. Amin'izao Alahady izao àry aoka isika hiaraka hivavaka mba hahafoy tena tokoa isika. Hivavaka ho an'ireo mpitondra antsika mba hahafoy, tsy hanjaka ao aminy ny fitiavan-tena fa izany no manapotika antsika rehetra amin'izao satria manankarena isika saingy harena angonin'olombitsy fotsiny ka tsy mahaso ny be sy ny maro ka hangataka àry isika mba halalaka ny fon'izy ireo ka hahafoy.

Ry Kristy zokinay ô, nanome anay ohatra velona ianao ary ampianarin'ny fahendrenao izahay hanorina ny fanjakanao ao anatin'ny fanetren-tena sy fahalemem-panahy, koa ampianaro izahay hahafoy. Izay fanjakana aorinao eto aminay izay no fanjakana tianay hiorina eto aminay tokoa, hiarahanay manorina miaraka aminao anatin'ny fifankatiavana vokatry ny fahalemem-panahy, fanetren-tena, fahafoizana—ka amin'izay izahay dia ho fianakaviana araiky aminao, ho olo araiky aminao ka hahazo ny tena fiadanana sy ny fandriampahalemana ao anatin'ny fiadanana marina sy ny fampanjakana ny rariny sy ny hitsiny. Amen

Mompera Arseveka Mgr Benjamin Ramaroson